

ABSTRAK

Disertasi ini merupakan satu kajian terhadap pembaharuan seorang tokoh yang sangat terkenal di Aceh dalam tahun 1930 hingga 1980 iaitu Teungku Muhammad Dawud Beureu-éh. Ia bertujuan untuk membongkar segala misi, visi dan pembaharuan beliau dalam berbagai bidang kehidupan seperti bidang politik, pentadbiran, pendidikan, pengkaderan, dakwah, ekonomi, dan sosial kemasyarakatan.

Huraian tentang kehidupan Teungku Muhammad Dawud Beureu-éh ini akan meliputi perkara-perkara yang berkenaan dengan riwayat hidup beliau. Perkara ini akan menguraikan latar belakang keluarganya, pendidikannya, keulamaannya, kepemimpinannya, politik, dan latar belakang masyarakat beserta pengaruhnya. Semua perkara ini penulis tempatkan pada bab pertama sebagai pembuka dari semua bab-bab yang sedia ada.

Berkenaan dengan sejarah perjuangan beliau yang melingkupi perjuangan seorang ulama dan pemimpin menempati bab kedua. Dalam bab ini penulis akan menguraikan faktor-faktor yang menyebabkan keulamaannya, usaha dan kerja seorang ulama, pimpinan Persatuan Ulama Seluruh Aceh, Gabenor Tentera untuk wilayah Aceh, Langkat dan Tanah Karo, dan Gabenor pertama untuk wilayah Aceh. Di sini akan didapati semua jenis tindakan yang boleh dianggap sebagai sumbangan beliau untuk negara, Islam dan juga kepada ummat yang pernah dilakukan selama hidupnya, sebahagian daripadanya merupakan persoalan-

persoalan yang sangat payah dilakukan orang lain namun mudah dan telah berjaya dibuatnya.

Analisa pembaharuan beliau penulis tempatkan pada bab ketiga yang membidangi perkara-perkara seperti berikut: pembinaan umat manusia dalam berbagai aspek dengan mendirikan PUSA, mendirikan Dayah dan Madrasah serta mengadakan pengajian-pengajian yang berterusan. Pembinaan infra struktur masyarakat yang pernah dilakukannya akan meninjau kerjanya membangun Masjid-masjid, Dayah-dayah dan juga sekolah-sekolah, membaiki jalan, serta mewujudkan pelbagai irigasi dan saluran air. Sisi lain adalah analisa tentang kejayaan dan kegagalan pembaharuan beliau dalam bidang dakwah, pendidikan, ekonomi, politik dan keberjayaan dalam bidang bermasyarakat. Yang terakhir adalah pandangan masyarakat dan kerajaan terhadap beliau.

Sementara bahagian akhir dalam tulisan ini adalah penutup yang penulis rangkum dalam bab empat dengan huraian singkat yang berkenaan dengan kesimpulan dan saranan. Selain itu ada sejumlah lampiran yang punya kaitan langsung dengan penulisan ini turut penulis tempatkan untuk memperkuat semua data yang ada di akhir tulisan ini. Daripada kajian ini terbukti bahawa Tengku Muhammad Dawud Beureu-éh merupakan seorang tokoh mujaddid yang luar biasa dan berjaya dalam agenda membangunkan masyarakat, walaupun perjuangan membebaskan Aceh terputus di tengah jalan.

--=hya=--